



Kamis, 12 Agustus 2021

Ogen: 1 Tesalonika 5:17-18



Ertotolah Katawari Pe



Katawari nge si pasna kita ertoto? Nina kalak si pasna ertoto jam 12 berngi, i je banci fokus ercakup ras Tuhan, lanai lit kalak si ngganggusa, i je ibegiken Tuhan pertotonta. Lit ka deba si ngtakensa jam 4 erpagi-pagi, alu alasen si seri, lit ka si ngatkensa jam 6 erpagi-pagi ope pultak matawari, sabap e lit tersurat i bas Pustaka Si Badia. Si tuhuna katawari nge pas?

Kerina paksa mehuli guna ertoto, sabap paksa-paksa e pemere Tuhan subuk erpagi-pagi, ciger, karaben seh ku berngina. Ertoto e eme ercakup-cakap ras Tuhan kerna kai pe, subuk kerna pasu-pasuNa si mbelin si enggo si bentasi ras si idalani kita, subuk pemindonta kerna sura-sura ras keperlun geluhta, banci ka nuri-nuri kerna perbeben geluh. Labo kepe ibalengi waktu adi ateta ercakup-cakap ras Tuhan. Arah ertoto me dalanna kita reh rembakna ras Tuhan. Reh ulina hubungenta ras IA. Kalak si rembak ras Tuhan nge si meteh sura-suraNa, sabap rusur ia arih-arih. Reh rusurna kita ertoto, reh ngasupa kita mpersada sura-suranta ras sura-sura Tuhan. Adi enggo ersada sura-sura enggo ngasup kita ngaloken kai si jadi man banta. Entah e keriahen, entah e ndele ate, entah e sakit pinakit ras si mesui. Inget maka Tuhan la pernah nadingken kalak si rembak ras IA i bas kerina situasi.

Erkrite-kiteken rembak ras Tuhan nge dalam-dalanna kita ermeriah ate. Desken sekalak teman si erkandu-kandu, tempa lanai lit i je jarak. Kai pe situriken man temannta, keluh-kesah entah si meriah. Labo lit rahasia i bas kalak si erkandu-kandu, amin lit nge keterbatasan kandu-kandu nandai temanna. Dibata e me kandu-kandu si la erbaleng, ietehNa kerina kecibalta ras isi pusuhta, la pe situriken angkaNa. Tapi metedeh kin anteNa kita ercakup ras nuri-nuri man baNa. Ras situhuna Dibata e pe merincuh nge nuri-nuri man banta.

